

# Die Ou Pastorie kry nuwe eienaar

• *Quarta Pretorius*

Die Ou Pastorie, destyds eiendom van die Nederduits Gereformeerde Kerk, is geleë op die hoek van Ringer- en Voortrekkerstraat Heilbron.

Tot onlangs het dit behoort aan Johan en Liddi Subke. Volgens Argief dokument is Erf no 354 (Akte no 57491) in 1900 deur Jacobus Groenewald gekoop. Met inagneming dat die Anglo Boereoorlog tot Mei 1902 geduur het, is die huis waarskynlik eers na die oorlog gebou.

Die huis het verskeie eienaars gehad. In 1935 het Sam Pierce die pragtige huis aan die kerk verkoop vir die bedrag van 1150.00 pond. In 1959 is die woning verkoop toe die Kerkraad van die Heilbron Suid gemeente besluit het om 'n nuwe pastorie in Piercestraat te bou. Die huis het toe die naam van "die Ou Pastorie" gekry. Die laaste predikant wat daar gewoon het, was ds. Du Randt.

Daar was oorspronklik vier kaggels in die

huis, maar die kombuis se skoorsteen is toegemaak toe 'n elektriese stoof in 1941 geïnstaleers is. Die drie kaggels is in die eetkamer, studeerkamer en in die sitkamer.

Op die erf is nog 'n motorhuis (vroeër 'n skuur) en die oorspronklike hoenderhokkies en buitegeboue. Van hierdie geboue was eers die koeistalle gewees.

In 1922 is die voorstoep geteel en die paadjie na die klein hekke soos wat dit vandag nog is, gelê.

Hierdie pragtige historiese gebou weer spieël die vroeë geskiedenis van Heilbron.

Hiermee wil ek die nuwe eienaar baie gelukwens met sy koop van hierdie pragtige historiese huis. Piet ek is oortuig dat jy hierdie besondere juweel weer gaan restoreer tot sy oorspronklike glorie.

Ek is net so dankbaar dat jy die nuwe eienaar is, want nou weet ek dat hierdie pragtige historiese huis nie ook in 'n plakkerskamp omskep gaan word nie.



## Huis- en Tuinbouklub kuier by Vaalkrans

Daar is gou onder mekaar reëlins getref oor wie ry saam wie, en sommer net so is die dames van die Huis- en Tuinbouklub Woensdag op pad Vaalkrans toe. 'n Interessante dag het vir hulle voorgelê toe Maryna Serfontein (spreker) vir hulle 'n demonstrasie kom doen het oor die maak van verskillende tee's van kruie. *Smoothies* was ook op die agenda. Sy noem dat daar vyf gebruikse-eienskappe van kruie is, naamlik: 1. Dit gee 'n lekker smaak aan kossoorte. 2. Daar is vele gesondheidsaspekte vir die gebruik van kruie. 3. Tee kan gemaak word. 4. Dit kan gebruik word vir medisinale doeleindes. 5. Dit verjaag gogga's. Verder moedig sy vrouens aan om groente en of kruie te hê. "Al het jy slegs net vyf kruie in 'n klein tuintjie naby jou kombuis". Begin met tiemie, roosmaryn & oreganus, wat hou van "droe voete" - min water. Dan pietersielie en basiliekruid

wat meer water vereis. Gebruik kruie wat in jou tuin beskikbaar is. Daar is geen resep vir die hoeveelheid kruie wat gebruik word nie. Daar is na die wye spektrum van onder andere laventel, kruisement en roosmaryn ook gekyk. Roosmaryn staan bekend vir "rememberense", so verwys Magaret Roberts dat die gebruik van roosmarynblare alzheimers kan voorkom - die are na die brein word ooggemaak. Omdat *smoothies* nou die "gons" woord is - die cool-ding is, is die "green blood" *smoothie* gedemonstreer. Dit bevat groen en wit groente en vrugte wat gemeng word. Die wortel of pynappel *smoothie* is ook aan die dames gewys. Tydens die demonstrasie is heerlike tee's en *smoothies* geproe. Tuisgebakte brood met kruie is voorgesit met twee verskillende pattee's. As nagereg is heerlike shortbread met laventel geniet.



Op die foto vl: Maryna Serfontein (Spreker), Marlize Swart, Charmaine Leeb, Hettie van Tonder, Rose Broodryk en Colleen Franklin (Vaalkrans).

## Amána verf Badplaas rooi

• *Oompie trap die petrol dat ons vinniger kan ry!*



LAAT DIE WIELE ROL: Lede van die Amána-ondersteunersgroep wat Badplaas besoek het. Agter van links: Sarita Els, Wilma du Plessis, Boet van Zyl, Rentia Keogh, Ina Venter, Elza Kriel en Rita Groenewald. Voor van links: Monica Coetzer, Isabel Bennik, Mart-Louise van Rensburg, Stephanie Hutchens, Dienkie van Rooyen en Rita Serfontein.

Wildsritte, boottrippe, Bingo-roepe, konsertgroepe, borrelbadde, laataandgrappe, kaartspeelwenne, glip-glappreipenne, heerlike kosshappe, nuwe vriendskappe... Dit is maar net 'n paar van die hoogtepunte wat op 'n groep Heilbronners gewag het toe hul vir 'n week lank Badplaas op horings gaan neem het.

Op 7 April het 15 lede van die Amána-ondersteunersgroep 'n gehuurde bussie vanuit die Vaal behoorlik vol gelaai en die langpad na Mpumalanga aangepak. Sommer met die inklimslag het daar al 'n goeie gees onder die haan en veertien hene geheers. "Julle vier in die agterste ry moenie nou al die 'plattetjie' uithaal nie," is daar geskerts en toe oom Boet, die busbestuurder, met hul vertrek sterkte toegewens is, het hy net die boeremusiek harder gedraai en gewaai. 'n Week vol opwinding het op die groep gewag.

Met hul aankoms by die Badplaas Rotary Resort, is hul vriendelik ontvang en aan die groep Boksburgers, wat ook vir die week daar

tuisgegaan het, voorgestel. Alhoewel dié Gautengse groep uit 48 besoekers bestaan het, was dit van die staanspoor af duidelik: dit vat net 15 Heilbronners om 'n oormag te oorheers en óf oom Boet in 'n rok aan etenstafel, óf die bottel jellielekkers-met-skop nou daartoe bygedra het, kon nog nie bevestig word nie.

Daar is elke dag heerlijk in die warmswembaddens gebaai, tot laataand kaart en ander spelletjies gespeel en deur die dag verskillende aktiwiteite bygewoon. 'n Besoek is onder meer aan die Cradle of Life gebring. Hier word verskillende diere wat op die rand van uitsterwing in die natuur is, bewaar. Spesies soos witleeus, wolwe, tiere, jagluiperds, pumas, jaguars, hiënas en selfs jakkalse kon besigtig word.

'n Bootrit op die Vygeboomdam is ook deur die groep aangepak en alhoewel die groep se swemvermoë aanvanklik onder mekaar bevraagteken is, het die "skeepskaptein" almal se vertroue gewen en die groep weer veilig

aan wal terug besorg.

Een van die week se hoogtepunte was beslis die konsertaand. Wat maak 'n spul boervroue op toer deur Europa as die die lus na 'n boereontby jou oorval? Watter nagmerries hou Christoffel se vroujie saans uit die slaap? En weet jy hoe klink Heilbron se nagtegalle in die koor? Een ding is seker: Heilbron het talent!

Aan die einde van die week was almal dit eens: "Ons maak beslis weer só!"

• Die Amána-groepslede wat die uitstappie meë gemaak het, was Boet van Zyl, Elza Kriel, Dawn Wessels, Dienkie van Rooyen, Mart-Louise van Rensburg, Hettie

Dannhauser, Monica Coetzer, Isabel Bennik, Sarita Els, Wilma du Plessis, Rita Groenewald, Rita Serfontein, Ina Venter, Stephanie Hutchens en Rentia Keogh.

• Die Amána-groep is gestig nadat daar 'n behoefte aan ondersteuning in die dorp ontstaan het onder inwoners wat al hul lewensmaats aan die dood moes afstaan. Intussen het talle ander vriende en ondersteuners al by die groep betrokke geraak. Die groep kom maandeliks byeen waarna hul geestelike pitkos met mekaar deel, lekker saam eet en kuier en so nou en dan uitstappies saam onderneem.

• Die volgende Amána-byeenkoms vind op 19 Mei by die Diensentrum plaas. Vir navrae kan Elza Kriel gebel word - 083 988 5712.



ALMAL AAN BOORD: Lede van die Amána-ondersteunersgroep maak seker hul mis nie uit op die dag se aktiwiteite nie.



DAAR GAAN DIE ALIBAMA: 'n Bootrit op die Vygeboomdam het deel van die week se verrigtinge uitgemaak.



GLIP-GLAP: Tydens die Amána-groep se besoek aan Badplaas, is daar selfs heerlijk oor die breinaalde geklets.



OP DIE STOEP: Staaltjies en stories word op Badplaas gedeel.